

Dithero tsa Tirelano mo Kutlwanong

54/2014 Ka moletlo wa go gopola bontšhwafatso jwa kereke , e le ka 02. 11. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno le re: "Gonne MORENA Modimo ke letsatsi le thebe; MORENA o tla abela boitshwarelo le tlotlo; ba ba tsamayang ka tshiamo ga a kitla a ba tima tse di molemo." Pes. 84:12,

1. Sefela sa 186 -172/179

2. Thapelo: Morena, yo o leng Mong-wa-thata-yotlhe, tshela Mowa o o Boitshepo wa gago mo godimo ga ba ba ikanyegileng ba gago, o re boloke mo bopelotlhomoging le mo boammaaruring jwa gago, o re golole ka metlha mo dithaelong, o re femele mo direng tsotlhe tsa rona, o fe kereke ya gago kagiso e e pholosang ka ene Jesu Keresete, Morwao, Morena wa rona yo o tshelang, a busa mmogo le wena le Mowa o o Boitshepo, Modimo yo o esi wa rona, jaanong le ka bosakhutleng. Amen.

3. Lefoko la Testamente e kgologolo le kwadilwe mo go Jesaya 62:6-12;

Epistolo ka fa thulaganyong ya 2 e kwadilwe mo go Baroma 3:21-28;

Efangele ka fa thulaganyong ya 1 e kwadilwe mo go Matheo 5:2-12.

4. A go ipolelwe tumelo ya bokeresete!

5. Sefela sa 184 - 170/177

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go Bafilipi 2:12-13, e re: "Jaanong, baratwi ba ka, ba lo ntseng lo utlwa ka metlha, e seng fela fa ke le teng, mme bogolo bogolo jaanong ke se yo, ipatleleng phologo ya lona ka poifo le thoromo; gonne Modimo ke ona o o dirang mo go lona go rata le go dira ka ntlha ya natefelo ya ona." Amen.

8. Thero: Phuthego e e rategang mo Moreneng Jesu Keresete, ke re: Go gakgamatsa go utlwa mo moletlong ya ntšhwafatso ya kereke mafoko a a reng: "ipatelele phologo ya lona ka poifo le thoromo;" O ka re: ke Tetzal yo o lelang go rekisa dikwalo tsa tseletso go tshosa bakeresete mo sebakeng sa ga Luther. Fa o sa tlhokomele dipolelo tse di latelang mafoko ao o ka gopola gore mafoko ao a fapaana le tsotlhe tse di kwadilweng ke Paulo ka bopelotlhomogi jwa Modimo mo mafelong a mangwe. Mafoko ao ke sekao se sentle se se re kaelang, se re: Lefoko la Beibele le tshwanetse go tthalosiwa ka mafoko a mangwe a Beibele. Ka mafoko ao go bonala tota gore go a tlhokega gore re tthaloganye mafoko a Dikwalo ka tse di kwadilweng go gongwe mo Beibeleng.

Kana mafoko ao a okediwa ka mafoko a temana e e latelang a a reng: "gonne Modimo ke ona o o dirang mo go lona go rata le go dira ka ntlha ya natefelo ya ona." Ke gore go a utlwala, fa Modimo o dira mo go rona go rata le go dira ka ntlha ya natefelo ya ona. Ke gore ditiro tse di siameng di tswa mo tumelong. Tumelo ke neo ya Modimo. Jakobo o utlwana le boammaaruri jwa gore Modimo o rata gore tumelo e dire ditiro mo go rona, a re: Tumelo e e se nang tiro e sule. Go itsiwe gore tumelo e e dirilweng mo go rona ka thato le tiro ya Modimo re ungwa maungo a Mowa. Setlhare se se molemo se ungwa maungo a a molemo . Setlhare se se bosula ga se ungwe maungo a a molemo. Fa re rata go bona maungo a a molemo, re tshwanetse go nna le setlhare se sešwa. Ka jalo o a tlhoka pelo e ntšhwa, le thato e ntšhwa. Mowa o mošwa o tswa mo Modimong. Mo kgaolong ya bobedi ya lokwalo go Bafilipi re a bolelelwa ka thanolo gore Jesu o kile a tla mo lefatsheng go nna Modiredi, a nna motho gore a kgone go re baakanyetsa tse tsotlhe tseo. A fitlha thata ya gagwe ya boModimo ka go re bogela, le go re swela mo sefapaanong, e nne Morena le Modiredi wa rona.

Re a itse gore ka ditsisabopelotlhomogi jwa Modimo Jesu o dira pelo e nšhwa mo rona, a re itshekisa gore re nne le botshelo le pholoso e re e baakanyeditsweng ke Keresete mo sefapaanong, tseo di fetisediwe mo go rona ka Lefoko la ga Keresete, di fetisediwe mo go rona ka didiri tse di nang le maikaelelo a tsona, e bong ka Lefoko, ka kolobetso, ka kgololo mo maleong mo boipobolong, le ka selalelo sa mmele le madi a ga Keresete. Ke didiri tse di farologanyeng, mme di tsa neo e le nngwe fela, e bong Efangele e e penologang mo dinthong mo letlhakoreng le le penologang la ga Keresete, le mo

diatleng le mo dinaong tsa gagwe, fa a ne a bapolelwa mo sefapaanong, e le madi a re a tshologeletsweng.

Ka mafoko a mangwe re ka re: Ke ka ntlha ya gore Modimo o ne a tsenya mo go rona thato le tiro ya ona mo dipelong tsa rona gore re kgone go dirafatsa le go ipatlela pholoso ya rona ka poifo le ka thoromol Ka go ipolela gore Lokwalo lo tthalosa Lokwalo lo longwe lwa Beibele re na le go lemoga gore se se bolelwang mo felong fa ka ga poifo le thoromo se rayang ka mofako ao, fa a dirisiwa ka Mowa o o Boitshepo mo mafokong a mangwe mo Beibeleng. Ke re: Go buiwa gantsi ka ga poifo le throromo, fa batho ba kopana le Morena yo o tshelang, gongwe le barongwa ba gagwe. Go kopana le Morena yo o tshelang go tshosa tota, jaaka ga diragala, fa mosadi a kopana le Jesu yo o tsogileng mo basweing fa pele ga phupu ya gagwe e e butsweng. Mme re boifa, le go roroma, fa re kopana le Modimo o o tshelang, ke gore re a o ikokobeletsa, re khubama fa pele ga ona ka go o obamela tota, le ka go ipolela gore kgololo mo poifong le go pholosiwa mo maleong a rona go tswa mo go ona fela. Paulo o tswelela ka go re bolelela gore o batlang mo go rona, fa re dira pholoso ya rona ka poifo le ka thoromo. Mo go Bafil. 2:14-16 a re: "Dirang tsotlhe kwa ntle ga dingongorego le dipelaelo gore lo nne lo se na molato, lo le bopelophepa le bana ba Modimo ba ba sa nyatsegeng mo gare ga batho ba ba kgopo le tshokamo, ba lona lo phatsimang mo go bone jaaka dinaledi mo lefatsheng; lo ntse lo kgomaretse Lefoko la botshelo go nna poko ya me ka letsatsi la ga Keresete ya gore ga ke a ka ka sianela lefela, le e seng go itapisetsa lefela." Yo o dirang tsotlhe a sa ngongorege, le e seng go belaela o tla tlhaloganya, le go tlotla, le go tumisa boitshepo le bopelotlhomogi jo bogolo jwa ga Rara yo o legodimong, le go latlha boikgogomoso jotlhe jwa gagwe, gonne Modimo o tshetse mo pelong ya gagwe thato e ntle, le go rata go direlana, Se segolo mo gare ga tsona ke go kgomarela Lefoko la botshelo. Ke go itshwarelela mo thateng ya Efangele. Ke go tiia ka go amogela ditsisabopelotlhomogi ka metlha, e le tse ditsisang bopelotlhomogi jwa ga Keresete mo mmeleng wa gagwe, o e leng kereke ya gagwe. Se segolo mo go direng pholoso ka poifo le thoromo bogolo mo go tse dingwe ke go ngaparela mo go Jesu ka go kopana tota le Modimo, le go amogela tse re di abelwang ke Keresete, gonne ke ene Mosimolodi le Mofetsi wa tumelo e e pholosang ka go mo ikanya. Ke sona se se dirang gore re kopane le ene ka poifo le thoromo mo tirelong-Modimo e re kopanang mo go yona le Morena yo o boitshepo, yo o tshelang. Ke kwa a re amang teng, le go dira mo go rona.

Ka moo re tshwanetse go itshwarelela mo Lefokong le le tshelang. Re tlhoka Efangele bosigo le motshegare, le ka botlalo jwa yona ka Sontaga. Ntle le Lefoko botshelo jwa rona bo tla ntshiwa, le go ntshiwa mo go rona ka tsamao ya malatsi. Keletso ya bonna jo bogologolo bo tla tlatša lefela la rona gape ka pele gore go boele mo go rona go ngongoregela Morena, le boikgogomoso bo tla tsena gape mo go rona mo boemong jwa poifo le thoromo fa pele ga Modimo. Go a batelga gore re rerelwe Efangele ka bophepa. Re tshwanetse go e reetsa ka ditsebe tse di kabologileng, fa lefoko le rerwa. Re tshwanetse go kopana kwa ditokololo tsa ga Keresete di kopanang teng go tlhapisiwa, le go itshekisiwa ka ditsisabopelotlhomogi.

Ka moo Paulo o tlhokometse Timotheo yo o neng a tlhongwa go tsena mo boemong jwa gagwe go direla diphuthego, a re: O itumeletse Timotheo yo o neng a ya mo go tsona, gonne o ne a itse gore Timotheo o tla di tlhokomela sentle, a re: Ene le Timotheo ba ne ba bua puo e le nngwe fela ka go nna boithlomo bo le bongwe fela ka kutlwano ya go tlhokomela le go boloka tse di tlhomilweng ke Keresete. Baruti ba ba sa tsholeng lefoko la botshelo, le e seng go abela phuthego masaitsiweng a Moidmo, ba itlhokomela fela, ke kotsi e e maswe mo phuthengong le mo kerekeng.

Ba ba ntseng jalo ke kotsi mo phuthengong, gonne kwa ntle le go itshwarelela mo bongwengfela jwa lefoko la botshelo, ke raya mo Lefokong le le neng la nna nama phuthego ga e nke e kgona go falola mo letsatsing la bofelo. Ke re: Go batlega go tlhologanya boammaaruri joo sešwa ka metlha le kajeno gore Modimo go o tshwane le monna yo mogolo yo o ratang go itshokela botlhe fela, le bone ba ba nyatsang Lefoko la Modimo ka go ngaparela mo maakeng a a reng: Botlhe ba tla amogelwa fela mo bokhutlong. Yo o sa fitlhelweng a ngaparetse mo lefokong la botshelo, le fa e le mongwe wa ba ga Keresete yo o bapoletsweng mo sefapaanong ka ntlha ya bone, tota-tota o mo tseleng e e yang mo moleteng wa molelo. Paulo o na le lebaka gore a tlhokomele ba ba ineelang mo tirong ya go nna baruti. Fa lefoko la botshelo le sa rerwe ka Sontaga le Sontaga le fa gare ga beke kwa le tlhokegang tseng, moruti yoo o tla amogelwa mo bathong ba lefatshe ka boitumelo fela. Gantsi phuthego ga e lemoge, fa e simolotse go iikanya gape le thata ya yona. Ka tsela eo phuthego e tla tabogela mo tatlhegong. Ke tsela e e utlwanang le bonna jwa rona. Tsela eo e kaiwa e e itumedisang, e tshegediwa ka megopolo ya batlhalefi ba le bantsi, le mo ditimetsong tsa dikereke tse dintsi tsa kajeno, le mo ditumelong tsa bogologolo.

Ka moo a re ngapareleng mo go Keresete ka poifo le ka thoromo, mo lefokong la botshelo jo bo re gogelang le nama ya rona mo sefapaanong, kwa re tla lemogang teng gore re fitlha mmogo le Keresete, le go swa le ene. Re gogelwa ka lona gore tsa lefatshe di bapolelwe mo sefapaanong le go boga mmogo le Keresete ka ntlha ya Efangele ya gagwe. Ke tse di re tiisang gore re sale Keresete morago, le go itshwarelela mo go ene. Keresete o ne a bogisiwa mo lefatsheng, le bone boPaulo le baapostolo ba bangwe ba ne ba bogisiwa ka ntlha ya Efangele, le baitshepi ba kereke ka metlha yotlhe, le ene Martin Luther. Modimo o ntšhwaditse kereke ka ene ka go mo senolela Efangele sešwa, ke raya lefoko la botshelo le le pholosang baleofi. Ke sona se se dirang gore ka Sontaga wa kajeno re gopola bontšhwafatso jwa kereke. Ka Sontoga ono ga re kopane fela go keteka fela go itebogela, gongwe go leboga bantšhwafatsi ba kereke, mme re kaelwa gore re dirafatse, le go ipatlela pholoso ya rona ka poifo le thoromo. Mo poifong ya rona re itshwarelela mo lefokong la botshelo ka go reetsa Efangele, le go lebogela kolobetso mo Modimong, le boipobolo le selalelo sa Morena, re rapele Modimo wa bopelotlhomogi o e leng Rara le Morwa le Mowa o o Boitshepo, re o tumise, gonne Morwwaona wa fologa mo legodimong, wa fologela mo go rona go re baakanyetsa pholoso, le go tla mo go rona ka taletso ya ona gore re amogele pholoso e re e baakanyeditsweng ke ona ka go dumela mo go Jesu Keresete. Amen.

- 9. Thapelo:** Bopelotlhomogi jwa Morena wa rona Jesu Keresete, le lorato lwa Modimo, le kopano ya Mowa o o Boitshepo a di nne le rona! A go lebogwe Modimo ka ntlha ya neo e e sa ka keng e tshwayiwa ka botlalo ka mafoko a a buiwang ke motho, ka o le phemelo ya rona gore re kgone go fitlha ke wena, fa re tlaselwa ke mmaba wa rona. Morena, o re thuse gore re se ka ra wela mo diatleng tsa mmaba yo o bosula, e bong Satane le batho ba lefatshe. Re a kopa gore fa re wa, re wele mo diatleng tsa gago ka metlha. Amen. Thapelo ya Morena: Rara wa rona yo o mo legodimong ...

10. Sefela sa 261 - 243/253

A kagiso ya Modimo e e fetang thaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. H. Schnackenberg, ka ngwaga wa 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.